

MANICHEOS

la tabelle: di une bande i bogns e di cheâtre i carognis.

Noâtris modernos o ridin di chesc' canpions, ma il vissi noi è lafè muart cun lôr. Al ven fûr a ogni pît alçât: cumunisc' bogns e democristians trisc', progressisc' carognis e reassionaris jusc', çanpiz pa la cuâl e fassisc' fûr di plonp. O l'incontrar, a secont che si cjale.

L'ultin spieli, par cumò, lu vin tal câs di Walter Reder e de Resistense. Stant che i todescs a erin duc' figuris porchis e i partigjans duc' galantoms, l'Italie antifassiste, antinaziste, republicane e scaturide de resistense, dute conpate, e à dismenteât par un lanp rognis e debiz e berdeis di ogni sorte par daj jù al tribunâl di Bari, ch'al à distinât di molâ, dopo passe 35 agns di colegjo, il boe plui orent, plui trist, plui cence cûr di dute la seconde vuere mondiâl. Un delincuent nol pò mai vê une buine condote, come ch'al cuntint il tribunâl militâr; un ch'al è carogne, al reste carogne ancje s'al è in isolament. Inveçit, un resistant, se par câs al à sgarât e magari al à fat fûr ancje lui cualchi vieli o femine o fruz, si trate di un fat isolât, ch'a erin âtris tins e la cause a ere sante e a santificave dut. Pa la cuâl, Reder al à di stâ dentri fintremai ch'al è fraidessût; cheâtris, che àn sconbatût pe libertât dal popul, ur tocje di dirit premi, pardon e puest di lavôr. Se di une bande si à di lassâ passâ dut par vie dai valôrs, di cheâtre bande no si à di perdonâ nuje, par vie de mancjance di valôr. Martars di une bande e lasarons di cheâtre. Ma esal propit tant fassil dividi la polente cussì? Ese propit vere che chêi disot a erin duc' farine di flôr e chêi disore dute semule?

Un popul civîl al vares di capî che bon e scart al è pardut e che, se ancje Reder al à sbalgjât, sbalgjos and'è stâz ancje in altrò.

«Tornant a savorâ la int cun cantins ancje sacrosanz di dolôr e di passion, si fâs dome danp. I muarz no tornin e cheâtris s'invegnin. Vòlino dâur un spieli a duc' che nô o sin miôr dai Mucs? O vin l'ocasion juste!» Pecjât che il resonament lu àn tirât fûr i radicâi, ch'a son «cualcuncuisc'» e fûr dal arc.

Avost 1980